

Апостол 09.01.2024

Б: Мир всем.

Я: И духови твоему.

Б: Премудрость.

Я: Прокимен глас 4:

Святым, иже суть на земли Его, / удиви Господь вся хотения
Своя в них.

Хор: Святым, иже суть на земли Его...

Я: Предзрех Господа предо мною выну, яко одесную мене
есть, да не подвижуся.

Хор: Святым, иже суть на земли Его...

Я: Ин Прокимен, глас 8:

Я: Веселитесь о Господе, / и радуйтесь, праведнии.

Хор: Веселитесь о Господе, / и радуйтесь, праведнии.

Б: Премудрость.

Я: ко ефесеем послание святого Апостола Павла чтение.

Б: Вонмем

Братие, возмогайте о Господе и в державе крепости
Его, облецытесь во вся оружия Божия, яко возмощи вам
стати противу кознем диавольским, яко несть наша
брань к крови и плоти, но к началом и ко властем и к
миродержителем тмы века сего, к духовом злобы
поднебесным. Сего ради примите вся оружия Божия,
да возможете противитися в день лют и вся содеявше
стати. Станите убо препоясани чресла ваша истиною, и
оболкшесь в броня правды, и обувше нозе во

уготовление благовествования мира, над всеми же
восприимше щит веры, в немже возможете вся стрелы
лукаваго разжженныя угасити. И шлем спасения
восприимите, и меч духовный, иже есть Глагол Божий.
*(Еф 6:10–17, зач. 233)

Братие, не хочу вас не ведети о скорби нашей, бывшей
нам во Асии, яко по премногу и паче силы
отяготихомся, яко не надеяться нам и жити. Но сами в
себе осуждение смерти имехом, да не надеющиеся будем
на ся, но на Бога возставляющаго мертвыя, Иже от
толикыя смерти избавил ны есть и избавляет; Наньже и
уповахом, яко и еще избавит; поспешающим и вам по
нас молитвою; да от мног лиц еже в нас дарование,
многими благодарится о вас. *(2 Кор 1:8–11, зач. 168)

Б: Мир ти.

Я: И духови твоему.

Б: Премудрость.

Я: Аллилуиа глас 4

Хор: Аллилуиа 3 раза

Я: Возваша праведнии, и Господь услыша их, и от всех
скорбей их избави их.

Хор: Аллилуиа 3 раза

Я: Многи скорби праведным, и от всех их избавит я
Господь.

Хор: Аллилуиа 3 раза